



Assemblée générale ordinaire du 18 mars 2008

Rapport d'activité du secrétaire général Thierry Ries

Juni 1999 : 29 Staten ënnerschreiwten d'Déclaratioun vu Bologna, mam Zil bis d'Joer 2010 ee gemeinsamen « Espace européen de l'enseignement supérieur » ze schafen

August 2003 : an der Chamber gëtt d'Gesetz fir d'Schafe vun der Uni Lëtzebuerg gestëmmt.

Oktober 2005 : d'Uni Lëtzebuerg feiert hir éischt richteg Rentrée académique an d'Studie ginn nom neie Bachelor/Master Prinzip organiséiert.

Juli 2008 : Déi éischt lëtzebuerger Bachelor-Diplomer ginn un d'Studenten iwwerrecht.

A fir d'Rentrée 2008 ginn alleguer d'Beamten aus der Carrière moyenne beim Stat um Niveau vun esou engem Bachelor rekrutéiert.

Alleguer d'Beamten aus der Carrière moyenne ?

Et bien, nee ! Eng eenzeg Carrière, an net der mannster eng, kritt och weiderhi vun der Regierung déi Formatioun refuséiert déi se zënter méi ewéi 25 Joer fuerdert.

D'Redaktere musse sech och weiderhi mat hirer Première begnügen an dat mat all de Konsequenzen déi dat fir déi jonk an och manner jonk Beamte mat sech bréngt.

Esou oder esou ähnlech kann et Enn dëst Joer an der Carrière moyenne ausgesinn. Der Regierung hire Virstellung no kéint et awer nach schlimmer kommen.

Déi zoustänneg Ministere plangen näämlech an Zukunft niewent der Carrière supérieure « authentique » nach eng zweet, eng Carrière supérieure « bis » anzeféieren. An dëser Carrière sollen dann alleguer déi Beamten agestuuft ginn, déi um Niveau vun deem neie Bachelor-Diplom rekrutéiert ginn. Dat wieren d'Schoulmeeschteren, d'Ingénieurs industriels, d'Éducateuren asw ... Alleguer déi Carrièren, déi am Moment nach zur Carrière moyenne gehéieren, mat Ausnam vun de Redakteren.

Mee domat net genuch ! Och an de Verwaltunge, soll esou eng Carrière supérieure « light » geschafe ginn. Eng Carrière also déi téschent eis, de Redakteren an der Carrière supérieure « authentique » intercaléiert gëtt.

D'Note iwver Bologna

D'lescht Joer hu mir nach op eiser Generalversammlung iwver de Sënn vun eiser Fuerderung no méi Formatioun ouni Gehaltsopbesserung diskutéiert.

Vu, dass aus dëser Diskussioun awer keng eendäitech Conclusioun ervir gaange war hu mir d'Thema « Formatioun » nach eng Kéier op den Ordre du jour vum nächste Comité geholl. D'Fro déi mir eis deemools gestallt hunn war déi op eis Fuerderung ënner hirer deemoleger Form ze vertrieede wier oder ob mir eis misse Gedanken iwver eng Réorientatioun maachen.

Et muss een allerdéngs soen, dass d'Diskussioun am Comité zum Deel duerch de Contenu vun enger Note beaflosst ginn ass, eng Note déi mir e puer Deeg virdu ganz inoffiziell ze gesi kruten.

An dësem Dokument, datéiert op Mee 2007, ginn anscheinend all déi Froe beäntwert, déi d'Regierung sech iwver d'Ëmsetze vum Bolognaprozess an der Fonction publique gestallt huet.

Sou proposéieren d'Auteurs zum Beispill déi schonn ugeschwate Carrière supérieure « bis » fir d'Bacheloren anzeféieren an de Recrutement an der Carrière supérieure « authentique » um Niveau vum Master ze maachen. Do dernieft beschäftegen se sech ganz intensiv mam Changement de carrière vun der enger Carrière supérieure an déi aner. Eng Procédure déi et engem Bachelor erlabe soll iwver e Congé de formation säi Master nozemaachen.

Een Thema oder besser gesot eng Carrière schéngt d'Regierung allerdéngs net weider ze interesséieren. An dat sin mir, d'Redakteren. Mol net mat engem Wuert gëtt an dëser Note der AGC hir laangjäreg Fuerderung no enger besserer Formatioun erwäant. Kee Wuert iwver eis Revendicatioun no engem Bachelor fir déi zukünfteg Redakteren. Et schéngt wéi wann d'AGC zënter méi wéi 25 Joer absolut kee Besoin a scho guer keng Fuerderung a punkto Formatioun gehat hätt.

Mir schéngen, wann ee vun dëser Note ausgeet, mat der aktueller Situatioun net nëmmen déck zefridden ze sinn, mä och nach weiderhin un eiser Première festzehalen.

(...)

Da maache sech d'Auteurs awer och nach Gedanken iwver de Changement de carrière vum Redakter a wéi esou eng Procédure dann an Zukunft funktionéiere kéint. Och hei soll op

d'Formation continue gesat ginn, an deem Sënn, dass de Redakter iwver e Congé de formation säi Bachelor-Diplom nomécht a sech dann op e Posten an der Carrière supérieure « bis » melle kann. Domat wier de Changement de carrière wéi mir en haut kennen definitiv ofgeschaaft.

An engem groussen Tableau ginn dann nach alleguer déi Carrièren opgezielt, déi haut schonn eng Formatioun BAC+ hunn an an Zukunft um Niveau vum Bachelor rekrutéiert solle ginn. Pro Carrière gëtt een hei niewent der aktueller Formatioun och déi dach zimlech ënnerschiddlech Ufanks- an Endgrade gewuer.

Sou kommen dës Carrièren ënner anerem vum 7 an den 13^{bis}, vum 8 an den 13, vum E3 an den E3^{ter} oder och nach vum 10 an de 14^{bis}.

D'Redakteren hunn et leider net bis an dësen Tableau era gepackt. Et ass just duer gaang fir eng Fousnote. Hei gëtt « en guise de comparaison » drop higewisen, dass de Redakter um Niveau vum Diplôme de fin d'études secondaires rekrutéiert gëtt an dass seng Carrière sech och vum 7 bis hin an den 13^{bis} erstreckt.

Wat d'Auteurs domat bezwecke wëlle misst jidderengem kloer sinn.

De Comité vum 14.05.2007

Esou ass et och net verwonnerlech, dass d'Diskussioun am Comité vum 14. Mee haaptsächlech vun dëser dach zimlech frustranter Note dominéiert ginn ass. Mee dovun ofgesinn hu mir eis trotzallem déi néideg Zäit geholl fir déi Bedenken déi an der leschter Generalversammlung iwver d'Formatioun geäussert gi sinn, fir déi Bedenken nach eng Kéier duerch ze diskutéieren.

An d'Conclusioun déi sech hei eraus geschiet huet war net nëmme eendäitech mä och nach eestëmmeg :

D'AGC ass keen Daachverband, mä eng Carrièresorganisatioun. De Statute no besteet den Objet vun eiser Associatioun doran, « de sauvegarder et de défendre les intérêts d'ordre professionnel tant matériels que moraux de ses membres ». Eis Responsabilitéit gëllt also eise Memberen, net de Primaner an och net de Bacheloren, mä eise Memberen. An dat sinn d'Redakteren, déi vu gëschter, déi vun haut an och déi muer, egal op wéi engem Niveau se rekrutéiert wäerte ginn.

Eise Memberen hir Interessen ze verdeedegen huet fir eis absolut Prioritéit. An dofir bleiwe mir och bei eiser Fuerderung no engem Bachelor fir déi zukünfteg Redakteren. Nëmme duerch eng besser Formatioun, kënnen d'Redakteren och an Zukunft nach hir Plaz an der Statshierarchie an och am Barème verdeedegen.

De Bréif un de Minister Wiseler

An esou hu mir dann eng weider Kéier de Minister Wiseler den 21. Mee an dëser dach schonn « däreger Affaire » ugeschriwwen. A sengem Courrier vu Januar 2007, hat de Minister eis matgedeelt, dass hien de Regierungsrat deemnächst am Kader vum Bolognaprozess mat engem « Document d'orientation » saiséiere géif.

De Contenu vun dësem Dokument hunn ech elo grad a graffen Zich resüméiert. An et ass méi ewéi kloer, dass d'Redakteren an dëser Note beschtefalls ignoréiert ginn. Plazeweis gëtt souguer mam Fanger op eis gewisen a mir gi regelrecht virgefouert. « Kuckt wéi wäit si « déi jo nëmmen d'Première hu » kommen a vergläicht se mat all deenen Aneren déi dach esou vill méi Studien hunn an trotzdem an der nämmelechter Carrière sinn ! »

Fir ze verhënneren, dass mir op eemol virum Fait accompli stinn, hu mir de Minister opgefuerdert endlech Stellung zu eiser Fuerderung ze huelen. Desweideren hu mir drop insistéiert, dass mir eis mat alle Mëttel géint d'Schafe vun enger Carrière intermédiaire wiere wäerten. Egal ob et sech hei ëm eng Carrière moyenne oder supérieure handelt. Et kann einfach net sinn, dass d'Redakteren deemnächst an der Statshierarchie an déi drëtt Rei verdrängt ginn.

Woura läit den Intérêt fir eng Carrière absichtlech ze dévaloriséieren ? An och nach grad eng Carrière déi Jorzéngte laang vun deene successive Regierungen als Réckrat, als « cheville ouvrière » vun der Verwaltung considéiert ginn ass !

D'AGC fuerdert zënter den achtzeger Joren eng besser a méi adequat Formatioun fir déi zukënfteg Redakteren. Déi « zukënfteg » Beamte vun deemools si mëttlerweil en fin de Carrière ukomm, an et huet sech ëmmer nach näischt um Niveau vun eiser Formatioun gedon.

Firwat kréien d'Redaktere systematesch dat refuséiert, wat all déi aner Carrières moyennes bis ewell accordéiert kritt hunn ?

Op all dës Froen huet de Minister Wiseler eis weider keng Äntwert ginn.

Et ass awer fir eis absolut inacceptabel, dass d'Redakteschcarrière an Zukunft nach just als eenzeg Carrière moyenne an der Statshierarchie iwweregbleiwe soll. De facto zeréckgestuift an als Opfangbecken, als Noutstopp fir alleguer d'Primaner wäert et eiser Carrière geschwënn esou ergoe wéi et den Expéditionnairë bis ewell ergaangen ass.

(...)

Och dat hu mir dem Minister Wiseler an eisem Courrier ze bedenke ginn. Mä wéi all déi Kéiere virdrun, huet sech de Minister zu kenger Reaktioun hiräisse gelooss. Eng Kopie vun

dësem Bréif war och nees un de Premier, d'Ministere Biltgen an Delvaux an d'Statssekretärin Modert adresséiert ginn. An nees huet net ee vun hinnen et fir néideg fonnt fir eis ze äntweren.

Eng Kloerstellung

Wann ech elo grad vun engem Opfangbecken, engem Noutstopp fir d'Primaner geschwat hunn, dann erlaben ech mir hei eng kuerz Klamer opzemaachen. Et geet mir eigentlech dorëms eppes kloerzestelle wat mir zënter eiser leschter Generalversammlung nach ëmmer um Mo läit.

Ee vun de Kollegen hat eis, dat heescht dem Comité eng elitär Astellung zu eiser « gudder aler Première » virgeworf. Sécher, mir ginn es net midd dorop hinzewiesen, dass de Premièresdiplom haut net méi dee Stellevuert huet deen e fréier eemol hat. Dat heescht awer net dass d'Schüler, respektiv d'Primaner vun haut alleguer méi domm oder méi liddereg wieren.

Esou eng Ausso huet d'AGC nach ni gemaach a wäert se och net maachen. Mä, d'Promotionscritèren am Secondaire si mat der Zäit ëmmer méi no ënne revidéiert ginn. A wie vun eis hätt sech net kéinten ee Joer spueren, e Joer dat en duerch eng Ongenügend oder duerch e ratéierten Noexamen doubléiert huet. Ouni iwver d'Matière ze jugéieren, muss een dach awer zouginn dass et duerch d'Aféiere vum Compenséieren a vum Travail de vacance oder Travail de révision deelweis méi liicht ginn ass fir sech bis op Première duerchzeschloen.

(...)

No der Première stellt ee sech dann engem Examen-concours wou nach déi al Critère vu virun 25 Joer zielen. An da geet et op eemol net méi duer. Och dat seet net nëmme d'AGC, dat geet ganz kloer aus de Resultater vun deene leschte Concoursen ervir.

Tëschent Mee 2004 a Juli 2007 hu sech 1421 Kandidaten dem Examen-Concours fir d'Redakteschcarrière gestallt. 333 vun de 1421 Kandidaten hunn den Exame gepackt, dat si genee 23,41 %. Déi bescht Sessioun war déi vum Mee 2004 mat engem Taux de réussite vun 31 %. Am schlechtesten ewechkomm sinn d'Kandidate kuerz drop am Oktober 2004, mat engem Taux de réussite vun nëmme 12 %. An dese leschte 7 Concourse lung den Taux d'échec 3 mol iwver 80 % !

Heescht dat awer dass et fréier besser war an dass di « al » Beamten, esouer wéi ech zum Beispill, optimal forméiert ware wéi se an de Statsdénsgscht agetruede sinn ? Mat Sécherheet net ! Wéi kéint ee sech soss erklären dass eis Virgänger an der AGC schonn Uganks den

achtzeger Joren eng besser a méi adequat Formatioun fir déi zukünfteg Redaktere gefuerdert hunn ?

D'Verwaltung huet sech an deene leschten 25 Joer grondleeënd verännert a weiderentwéckelt. An dat souwuel um reng nationale Plang wéi och um europäeschen a global gesinn um internationale Plang. Alleng dat europäescht Ëmfeld mat sengen Direktiven a Reglementer verlaangt vun de jonke Beamte vun haut vill méi e breetgefächert Grondwëssen, wéi dat fréier nach de Fall war.

De Secondaire huet awer döser Entwécklung net Rechnung gedroen, au contraire. An dofir ass d'Première vun haut net méi dat wat se fréier eemol war. Dat wat fréier nach sou just duergang ass, dat geet haut net méi duer. De Schüler kann een dofir sécherlech kee Reproche maachen, mä éischerter dem Schoulsystem. Awer dee wäerte mir als AGC wuel kaum geännert kréien ... Et ass och net eis Missioun.

Domat schléissen ech dann awer dës Klamer a kommen zeréck zum Bolognaprozess a senge Konsequenzen op d'Redakteschcarrière.

De Communiqué « Mise en oeuvre du Processus de Bologne »

An eisem Communiqué de presse mam Titel « Mise en oeuvre du Processus de Bologne ! » hu mir am Juni 2007 probéiert d'Ëffentlechkeet fir eis Revendicatioun ze sensibiliséieren.

Ëmmer nees liest een an der Press dass aner Carrièren es leed si sech an der selwechter Carrière erëmzefanne wéi déi Redakteren « déi jo nëmmen d'Première hunn ». Et war also un der Zäit, dass och d'AGC sech zu Wuert mellt an hier Fuerderungen un de Public bréngt.

Schliisslech wëlle mir quasi dat nämmlecht an zwar deem flagranten Déséquilibre um Niveau vun der Formatioun een Enn setzen. Just d'Methodologie ass liicht eng aner. (...)

Mee mat eise Communiquéen ass dat esou eng Saach. Mir kënne schreiwe wat mir wëllen, verëffentlecht gi mir ëmmer nëmmen am Journal. D'Tageblatt huet esou laang ech mech erënnere kann nach ni e Communiqué vun eis bruecht. D'Wort beschränkt sech op d'Generalversammlung, allerdéngs eréischt nodeems all déi kritesch Passage gestrach gi sinn.

Niewent der geschriwwener Press hate mir dëse Communiqué och un RTL Radio geschéckt. No engem Rappel am Juli ass en dann och do iwuer d'Antenne gaang. Dee selwechte Rappel ass och un d'Wort an un d'Tageblatt gaang, mä leider ouni Succès.

Et ass also net esou einfach als AGC d'Ëffentlechkeet ze erreechen. Anerer hunn et do méi liicht a kënnen esou Dag fir Dag der Natioun hir État d'âmes zum beschte ginn.

D'Entrevue Wiseler

Am Summer, kuerz virun der grousser Vakanz huet et dunn op eemol esou geschéngt, wéi wann d'Regierung am Kader vum Bolognaprozess kuerzfristeg e Projet presentéiere géif. Dat huet eis dozou bruecht dem Minister Wiseler de 17. Juli en Ultimatum bis den 1. August ze stellen. De Message war kloer :

Sollt et bis deem Dag net zu enger Concertatioun oder wéinstens enger Ouverture de dialogue kommen, da géife mir fir d'Rentrée all d'Redaktere beim Stat fir gewerkschaftlech Aktiounen mobiliséieren.

An esou hate mir de 26. Juli op en neits eng Entrevue mam Minister Wiseler. Anscheinend war him dru geleeën d'AGC nach virum Regierungsrot vum 27. Juli ze emfänken, e Regierungsrot an deem och iwver de Bolognaprozess geschwat géif ginn.

Mir hunn also vun der Geleeënheet profitéiert fir nees eng Kéier eis Revendicatioun ze erklären an ze ënnermaueren. Mir hunn awer och dorop insistéiert, dass eis Memberen d'Schafe vun enger Carrière intermédiaire op kee Fall acceptéiere wäerten.

De Minister sengersäits huet eis ze verstoe ginn, dass d'Diskussioun iwver d'Astuf vum Bachelor an der Fonction publique nach ëmmer net ofgeschloss wier. Hie kéint sech och duerchaus virstellen, dass de Stat an Zukunft d'Carrière supérieure nach just um Niveau Bachelor rekrutéiert géif. De Master, wat u sech eng Spezialisatioun ass, géifen dës nei Beamten eréischt dee Moment maachen, wou se bis eng gewësse Berufserfahrung gesammelt hätten.

Et war wéi een esou schéi seet eng interessant Diskussioun an engem gudden Klima. Mä méi awer och net. Wéi och schonn am Abrëll 2005 huet de Minister versprach mir géifen a Kontakt bleiwen.

Op dës Entrevue eppes bruecht huet oder net da sief emol dohigestallt. Mä ee Message ass ganz däitlech beim Minister ukomm:

Wann hie bis ewell dovun ausgaange war, dass mir eis Leit net FIR eng besser Formatioun mobiliséiert kréien, da muss hien awer kloer domat rechnen, dass mir se mat Sécherheet GÉINT eng Carrière intermédiaire op d'Strooss kréien.

Mä wéi och ëmmer, eng Décisioun iwver de Bachelor ass den Dag drop am Regierungsrot net gefall.

(...)

Den Avant-projet de loi « Changement de carrière »

Uganks Oktober hu mir dem Minister Wiseler zur Ofwiesselung mol eng Kéier kee Rappel geschéckt, mä en Avis iwwer säin Avant-projet de loi mat deem hien d'Carrière ouverte reforméiere wollt. An dësem Avant-projet sollt et anscheinend ëm d'Harmoniséierung vun den Dispositiounen iwwer de Changement de carrière goen.

Tatsächlech awer hätt dësen Avant-projet eenzeg an alleng eng Verschlechterung fir d'Redaktere mat sech bruecht. Un de Konditiounen a Modalitéiten no deenen een aus der Carrière inférieure an eng méi héich Carrière wiessele kann, hätt sech näischt geännert.

Fir d'Redakteren awer wier e « Plan de qualification individuel » agefouert ginn, mat spezifesche Formatiounen op enger Universitéit oder engem spezialiséierten Institut. Op dës Formatioun rémunéiert wier oder net ass jiddwerfalls net kloer aus dem Avant-Projet ervir gaang. Deemno wéi, hätt ee sech also an Zukunft misse froen ob ee sech iwwerhaupt esou e Changement de Carrière nach leeschte kann. Well an der Zäit wou een nees studéiere geet, leeft schliisslech de Prêt op d'Haus monter weider.

Desweideren huet dësen Avant-projet eis Revendicatioun no enger besserer Ausgangsformatioun absolut net berücksichtegt. Géifen déi zukünfteg Redakteren näämlech um Niveau Bachelor rekrutéiert ginn, da wier dee sougenannte « Plan de qualification individuel » total iwwerflësseg.

An deem Sënn hu mir dem Minister dann och en negativen Avis zoukomme gelooss an deem mir him matgedeelt hunn dass säin « Avant-projet » ënner der do Form fir d'AGC inacceptabel wier.

Och wa mir net weider op den Detail vum Text agaange sinn, da schéint de Minister de Message awer verstanen ze hunn. Den Avant-projet ass méttlerweil nees zeréckgezu ginn.

De GT Carrières hiérarchisées

Och nach am Oktober an als Reaktioun op der CGFP hier Fuerderung no enger genereller Gehälterrevisioun, hu mir am Comité décidéiert, de Groupe de travail vun de « Carrières hiérarchisées » nees ze aktivéieren. Dëse Groupe hat am Joer 2002 dem Minister vun der Fonction publique eng gemeinsam Proposition am Kader vun der deemools geplangter Gehälterrevisioun ënnerbreet.

Eng éischt Réunioun an engem méi klengen Krees ass Enn November ofgehal ginn. Deelgeholl un dëser Réunioun hu Verrieder vun der FEDUSE, dem Syndicat des P et T, der Spuerkeess, der FGEC an der AGC. Et ass festgehal ginn, dass een d'Propose aus dem Joer 2002 deelweis iwwerschaaffe muss, mä dass d'Grondiddi awer ëmmer nach valabel ass.

Eng weider Réunioun wäert dann och deemnächst organiséiert ginn.

De Bréif un de Premier

Mëttlerweil huet sech allerdéngs an eisem Dossier « Formatoun » weider näischt méi gedon. An esou hu mir eben dat gemaach wat jiddereen hei am Land mëcht wann e bei engem Minister net méi virukënnt. Mir hunn dem Premier geschriwwen an hien ëm eng Entrevue gebieden. Dat wat de 7. November.

De 9. November huet de Minister Biltgen um Radio 100,7 proklaméiert dass d'Regierung décidéiert hätt eng nei Carrière fir d'Bacheloren ze schafen. Dës Carrière soll an Zukunft tëschent d'Redakteschcarrière an d'Carrière supérieure intercaléiert ginn.

Dee selwechten Dag nach hu mir e Bréif un de Premier geschriwwen. Mir hunn him eist Erstaunen iwwer dem Minister Biltgen seng Aussoe matgedeelt. Mir hunn him awer och kloer gesot, dass d'Schafe vun esou enger Carrière intermédiaire fir eis absolut inacceptabel ass.

Net nëmme kritt dës nei Carrière déi Formatoun déi mir zënter Jore fir eis revendiquéieren. Do dernieft riskéieren d'Redakteren an Zukunft hir traditionell Attributiounen a « Postes à responsabilité » zu Gonschte vun dëser neier Carrière ze verléieren. Ofgesinn dovun, kéim d'Schafe vun enger Carrière intermédiaire, enger Zréckstufung vun der Redakteschcarrière gläich.

D'Schafe vun esou enger Carrière géif dann och vun der AGC, als Refus an eisem Dossier « Formatoun » considéiert ginn, wat als Konsequenz d'Saisine vun der Commission de conciliation mat sech bréngt géif.

Deen nämmlechten Text hu mir och nees un d'Press geschéckt. De Journal, RTL Radio an den 100,7 hunn dëse Communiqué bruecht. Am Tageblatt an am Wort ass en alt nees eng Kéier am ronnen Dossier gelannt.

Dem Premier seng Äntwert huet net laang op sech waarde gelooss. No knapp 14 Deeg huet hien eis matgedeelt, dass déi fir d'Ëmsetze vum Bolognaprozess zoustänneg Ministeren eng déifgräifend Reflexioun mat deene betraffene Milieue féiere géifen. Bei dëser Reflexioun géif et souwuel em d'Carrière wéi och ëm d'Pai vun deenen zukënftege Bacheloren goen. Hie verweist eis dann och op dëse « Processus de concertation » wou d'AGC dann d'Méiglechkeet kréie wäert fir hir Vuë virzebréngen.

D'Entrevue Wiseler a Biltgen

Dës Concertatioun war schlussendlech de 15. Januar 2008, a Präsenz vun de Ministere Wiseler a Biltgen. Vill neits war hei allerdéngs net gewuer ze ginn.

De Minister Wiseler huet drop higewisen, dass d'Regierung décidéiert huet d'Carrière supérieure an Zukunft um Niveau Master ze rekrutéieren. Iwwer d'Astufung vum Bachelor wier awer bis ewell nach keng Décisioun gefall.

De Minister Biltgen fir säin Deel huet eis dann emol de Bolognaprozess erkläert. Et ass jo net esou wéi wa mir dës Erklärungen net scho méi ewéi eng Kéier vum Minister Wiseler kritt hätten. Nujee, et war awer schéi fir dat Nämmlecht och nach eng Kéier vum Héichschoulminister héchstperséinlech ze héieren.

Mä op der anerer Säit huet de Minister Biltgen der AGC hier Ausféierungen an Iwwerleeungen « ganz interessant » fonnt. Hier war esouguer, an ech zitéieren, « richtig frou bei dëser Entrevue dobäi gewiescht ze sinn ».

Mir hunn dann awer och vun der Geleeënheet profitéiert, fir dem Minister Wiseler nach eng Kéier a ganz offiziell de Litige unzekënnegen, falls d'Redaktere beim Ëmsetze vum Bolognaprozess net berücksichtegt géife ginn. De Minister sot de Message wier ukomm an hie géif e mat an de Regierungsrot huelen.

Bedauerlech ass just dass dës Entrevue net iwwer de Kader vun engem einfachen Echange de vues erausgaangen ass. Wier et déi éischt Réunioun iwwer eis Revendicatioun gewiescht, da kéint een nawell soen : « Et war e gutt an interessant Gespréich ». Mä no dräi Joer war et nawell zimlech kale Kaffi.

De Comité vum 14.02.2008

A genee zu dëser Conclusioun ass och de Comité a senger Réunioun vum 14. Februar 2008 komm. E banalen Echange de vues, ouni konkret Resultat. Méi kann een iwwer d'Entrevue ministérielle vum 15. Januar net soen. Eisen Dossier « Formatioun » huet zënter Januar 2005 absolut net evoluéiert. Au contraire, en ass nach ëmmer net iwwer de Niveau vun enger einfacher Revendicatioun eraus komm.

Fir ze verhënneren, dass d'AGC iergendwa virum Fait accompli steet huet de Comité eestëmmeg décidéiert d'Commission de conciliation direkt mam Dossier ze saiséieren. Wa sech trotz all den Entrevuen, Bréiwer a Rappelen, no 3 Joer guer näischt gedon huet, da muss ee bal dovun ausgoen, dass d'Regierung net bereet ass op eis Fuerderung anzegoen. Aplaz eis dat awer ganz kloer an däitlech ze soen, spillt de Minister weider op Zäit an der Hoffnung eis iergendwa mat engem Projet de loi ze confrontéieren. A wa bis eemol e Projet um Dësch läit, da gëtt et nach méi schwéier fir d'Situatioun awer nach ze redresséieren.

Den 19. Februar, hu mir offiziell den Dossier un de Pierre Gehlen, President vun der Commission de conciliation weider ginn.

Mëttlerweil huet d'Commissioun eis informéiert, dass de Premier an och d'CGFP opgefuerdert gi sinn hier Verrieder ze designéieren. Een éischten Echange de vues téschent der AGC an dem President Pierre Gehlen ass fir den 8. Abrëll geplangt.

An engem klengen Communiqué hu mir d'Saisine vun der Commissioun bekannt ginn. RTL Radio, den 100.7 an de Lëtzebuerger Journal hunn dëse Communiqué bruecht. D'Wort an d'Tageblatt hunn e wéi erwaart « klasséiert ».

Ze bemierken ass hei just, dass déi zwou leschtgenannten Zeitungen awer kee Problem domat haten, eise grouse Communiqué vun der leschter Woch als deier bezuelten Annonce ze drécken.

Dossier « Formation », suite et fin ?

Voilà, dat do ass d'Situatioun, wéi se sech zur Zäit presentéiert. Et schéngt also wéi wann deemnächst eisen Dossier « Formatioun » no méi wéi 25 Joer ofgeschloss wäert ginn. An dat op déi eng oder aner Aart a Weis.

Am Joer 2003, huet d'AGC net nëmmen en neie Comité mä och en neie Bureau exécutif gewielt. Wéi dës nei « Equipe » ënner sengem aktuelle President ugetrueden ass, do war de Projet « Uni Lëtzebuerg » schonn a senger leschter Phase. Eis Bestriewungen, fir en « Institut Supérieur d'Administration et de Gestion » dach nach am Projet ënner Dag ze kréien, ware « Moutarde après dîner ». Wat also fir d'Schoulmeeschteren, d'Educatoren an d'Ingénieurs industriels méiglech war, dat kruten d'Redakteren alt nees eng Kéier refuséiert. Mä wat heescht hei refuséiert, eis Fuerderung gouf ganz einfach ignoréiert. Well eng Äntwert hu mir bis ewell nach ëmmer keng kritt.

Mä de Comité war deemools an ass och haut nach méi wéi jee fest dovun iwwerzeegt, dass d'Zukunft vun eiser Carrière vun enger besserer a méi adequater Formatioun ofhänkt.

Am Géigesaz zou fréier awer, geet et dës Kéier em d'Ganzt. Wann d'Redakteren, beim Ëmsetze vum Bolognaprozess net berücksichtegt ginn, dann ass d'Thema Formatioun an Zukunft gelaf. Op der enger Säit gëtt et téschent dem Bachelor an dem Premièresdiplom keng weider unerkannte Formatioun an och keen Diplom. Op der anerer Säit awer wäert sech eng nei Carrière virun eis drängen, eng Carrière déi eben um Niveau vun deem vun eis gefuerderten Diplom rekrutéiert wäert ginn.

Beispill UCM

Dass et och elo schonn net ganz gutt ëm eis Carrière steet, wëll ech kuerz mat engem aktuelle Beispill illustréieren. Kierzlech ass de Personalkader vun der Union des caisses de maladie, ëm 19 Unitéiten erweidert ginn. Dat ass u sech näischt Ongewéinlech. Mä dës

Kéier ass eenzeg an alleng den Effectif vun der Carrière supérieure vu bis ewell 12 op 31 Beamten eropgesat ginn. Dat ass eng Augmentatioun vun 153 %.

Dëse Renforcement geschitt am Hibleck op d'Fusioun vun de Krankekeesen. Vu dass hei eng Rei vu bestehende Servicer an der neier Krankekeess oder « Gesondheetskeess » regroupéiert ginn, schéngt et absolut noutwenneg ze sinn, dass de Cadre dirigeant massiv opgestockt gëtt. 4 vun dësen neie Poste ginn a Servicer affektéiert déi am Moment nach ënner der Responsabilitéit vun engem Redakter stinn. Ab 1. Januar 2009 wäert dat dann net méi de Fall sinn. Esou vill zum Thema Verloscht vun eisen traditionellen Attributiounen a Responsabilitéitsposten.

Mä et kënnt nach besser. D'Fusioun vun de Krankekeesen huet als Haaptobjektiv d'Servicer ze rationaliséieren an ze optimiséieren. A fir net géint dësen Objektiv ze verstoussen, soll dëse Renforcement vun der Carrière supérieure kompenséiert ginn. Dem Exposé des motifs no wäerten eng Rei vun Employéen, Expéditionnairen an och Redakteren, déi wéi et esou schéin heescht « de Service verlooss hunn » an Zukunft net méi ersat ginn.

Et bleift also net nëmme bei engem Transfert vun Attributiounen mä et kënnt och nach konkret zu engem Transfert vu Posten. Déi eng Carrière gëtt méi kleng fir dass eng aner wuesse kann.

D'Bachelor-Carrière

A genee dat ass och de Grond firwat sech d'Schafe vun enger neier Bachelor-Carrière fatal op eis eege Carrière auswierke wäert.

Et geet numol net duer fir eng nei Carrière nëmme um Pabeier ze schafen. Als nächst Etap mussen dann och déi deemtspriechend Posten an de Ministären a Verwaltungen nokommen. Dass dës nei Posten och hir eege Fonctiounen an Attributiounen brauche, läit op der Hand. An dat Ganzt wa méiglech ouni de Statsbudget zevill ze belaachten.

Fir dat alles ënner een Hutt ze kréien, muss et einfach zu engem Transfert vu Kompetenzen a Posten, vun enger Carrière an déi aner kommen. Elo kann ee sech awer kaum virstellen, dass de Stat bereet ass fir Beamten aus der Carrière supérieure mat momentan nach 4 Joer Studien, duerch Bacheloren mat « nëmme » 3 Joer Studien ze ersetzen. Et wäert also éischer zu engem Transfert aus der Redakteschcarrière an déi nei Bachelor-Carrière kommen.

D'Auswierkungen op eis Carrière sinn evident. Eng Reduktioun vum Effectif total féiert zu manner Posten am Cadre fermé. D'Konsequenz heivun ass eng Verschlechterung vun eise jonke Kollegen hire Carrièrespektiven.

An och wat d'Attributiounen ugeet, wäert et alt nees op Käschte vun de Redaktere goen, fräi nom Motto « Qui peut le plus, peut le moins ». Wann d'Redaktere bis hir traditionell Attributiounen a Postes à responsabilité zu Gonschte vun der neier Carrière verluer hunn, da wäert et och net méi laang daueren, bis eise Grade de substitution a Fro gestallt gëtt.

Conclusioun

Wéi ech Uganks scho gesot hu, besteet den Objet vun eiser Associatioun net nëmmen doran déi materiell, mä och déi moralesch Interesse vun eise Memberen ze verdeedegen.

Et ass relativ einfach eng Masse ze mobiliséieren, wann ee Gehaltsfuerderunge stellt, déi monatlech engem supplémentaire Mindestloun entspriechen. Méi komplizéiert gëtt allerdéngs wann et « nëmmen » drëm geet, dofir ze suergen, dass eng Carrière och no Bologna nach Bëstand huet.

(...)

An dofir ziele mir ganz besonnesch op är Hëllef an är Solidaritéit. Op jonk oder manner jonk, ënnerstëtzt d'Action syndicale vun der AGC. (...)

Well et geet net nëmmen ëm eis Carrière an eis Zukunft, mä et geet och a ganz besonnesch ëm Zukunft vun eiser Carrière.

Mir kënnen net domat d'accord sinn dass eng nei Carrière tëschent eis an d'Carrière supérieure intercaléiert gëtt !

Mir kënnen net domat d'accord sinn dass dës nei Carrière déi Formatioun kritt, déi mir zënter méi wéi 25 Joer fuerderen !

Mir kënnen net domat d'accord sinn dass duerch dës nei Carrière d'Redakteren an déi drëtt Rei verdrängt ginn !

Mir kënnen net domat d'accord sinn dass de Kader vun de Redakteren zu Gonschte vun dëser neier Carrière ofgebaut wäert ginn !

A mir kënnen och net domat d'accord sinn dass sech d'Carrièresperspektive vun eise jonken a och manner jonke Kolleginnen a Kollegen an Zukunft drastesch verschlechtere wäerten.

Ech soen Iech Merci